

Is gòcius de Santu Lussòriu, Santu Millanu e Santu Sarbadori

In Sardigna cun su faeddu gòcius (gosos, còcios) est inditada una casta de càntigos religiosos dedicados a is Santos o a sa Vèrgine. Segundu is istudiosos custa forma de càntigu polifònicu si diat èssere difùndida in Sardigna de sa penìsula ibèrica; sa denominatzione sarda, difatis, diat dipèndere dae su tèrmine catalanu "goigs" e de cuddu castillianu "gosos", ateretantu originados dae su tèrmine latinu "gaidium", chi si podet tradùere cun cun "brògiu". Is gosos sardos sunt prus che totu costituitos dae una secuèntzia de teladas de otonàrios introduida dae una batorina; is ùrtimos duos versos de sa batorina introdutiva sunt in generale postos a s'acabbu de cada tella, in funtzione de ritrogada. Is modalidades esecutivas de custos càntigos sunt medas (càntigu a tenore, a concordu, in forma polifònica, cun acumpagnamentu istrumentale, etc.) e a s'ispissu si distinghent a segunda de s'àrea geogràfica de riferimentu. Inoghe proponimus is gòcius de Santu Lussòriu, Santu Millanu e Santu Sarbadori, donados cun cortesia dae is comitato de Tortolì chi ddis torramus gràtzias

Gòcius de su gloriosu màrtiri Santu Lusciori



Cavalieri rispetau,
de Sardigna risplendori
Sias nostru intercessori
Lusciori Santu avocau.

Illustri e forti campioni,
ses de Casteddu ornamentu,
de nobili nascimentu
ma de falsa religioni.
Negas s'adoratzioni a
su Deus umanau.

Su nòmini tu, Lusciori,
indicat ardenti lugi,
po chi risplendat sa grugi
de Gesùs nostru Signori
po dissipai s'errori
de is gentilis abbratzau.

De is annus su mellus frori,
a is militaris impresas
dedicas, e cun prodesas
dimostras grandu valori
Diocletzianu imperadori
meda stima t'at mostrau.

Unu salmu in sa scrittura,
sendi lìgiu po acidenti
as provau internamenti
una celesti dorciura
po custa sola litura
ses cunvèrtiu e batiau.

Spintu de onori vementi,
abandonas cun pretesas
onoris, domu e richesas
po bivi penitenti
sentz' e consòrziu de genti,
in d'una gruta inserrau.

Acanta de Monteleone,
est cussa gruta orrorosa
innia grata e delitziosa
ti fissas s'abitatzioni
su digiunu e s'orazioni

est su pastu prelibau.

Biendu chi s'idolatria,
totu s'isola infetada
lassas cussa gruta amada
e partis cun allegria
ses a totus, lugi e ghia
po distrugi su pecau.

Dealàsiu su presidenti,
scit chi sa lei pagana
disprezdas, e a sa cristiana
as cunvèrtiu meda genti
dona òrdini imponenti
po chi bengas arrestau.

S'astutu circat maneras,
de ti podit dissuadiri
e prontas ti fait biri
penas duras e severas;
cun regionis is prus veras
d'as cunvintu e annientau.

Mi declaru Cristianu
intrèpidu ddi respundis
avvilessis e cunfundis
su Presidenti romanu
Chi crudeli e disumanu
t'at a morti cundennau.

Delàsiu tennit timori,
de unu motu populari,
poita ses de singulari
parentela e de valori ;
e a Fordongianus s'onori
de unu màrtiri at donau.

De Casteddu a Fordongianus,
ses portau segretamenti ;
ti flagellant aspramenti
in d'unu modu inumanu
non ti lassant ossu sanu,
ses po mortu abandonau.

Su divinu Redentori,
ti risanat is feridas,

cussas gràzias erricidas
predicas cun prus ardori;
cali apòstolu de amori
ses de totus ascurtau.

T'aparìcias a sa morti
penitenti in su desertu;
innia Deus ti rendit certu
cussa bella e rara sorti;
cun sa fidi prus che forti
a Casteddu ses torrau.

Delàsiu cun amargura
scit chi ses ancora biu
e fortementi inaspriu
ndi rinnovat sa catura;
e ordinat chi cun premura
bèngias foras degogliau.

Sendi andendu a su destinu
sighiu t'ant dus pipius
in sa pròpriu sorti unius
Zizèllicu e Camerinu;
lillus de gratu giardinu
chi su celu at conquistau.

Selàrgius t'at erriciu
su sàmbini generosu;
e de is àngelus su gosu
su Spiritu at cunsighiu
su corpus t'ant'afligiu
cun onori est sepultau.

Teni de is Sardus memòria
difendi sa Pàtria amada,
po chi sa fidi abratzada
mantengàus cun vitòria
de cussu sògliu de glòria
protegi su sconsolau.

Gòcius de Santu Millanu



S'Onnipotenti t'at fatu
de sa fidi difensori
Millanu vivu ritratu
de Gesus su veru pastori

In su Tempus de Neroni
Nascis de babbu paganu
de pàtria cagliaritanu
gentili de professioni
Tui totu in s'educatzioni
conoscis su Redentori

Candu intendis is sermonis
de santu Giacu e Clementi
abbandonas prontamenti
is falsas adoratzionis
e cumprendis is aregionis
de sa lei de prus valori

Santu Perdu t'at batiau
e ordinau de Sacerdotu
po essi tui prudenti e dotu

t'at de Obispu cunsagrau
sendu de Casteddu prelau
dimostras zelu e fervori.

Cun frècias e turmentus
ti ordinat Felis tirannu
chi abandonis, o Millanu
is catòlicus intentus
ma cun Santus pentzamentus
dispretzas tanti rigori.

Ti fulminat a s'istanti
una sentèntzia de morti
po ti biri tanti forti
in sa lei firmu e costanti
cun su petus che diamanti
predichendu cun fervori.

In sa pianura de Sestu
su sàmbini as tui versau
crudelmenti apperdiau
po non morri tantu prestu
custu barbaru turmentu
abbivat prus su valori.

Ses mèdicu prodigiosu
chi curas oga dolèntzia
callenturas e schinèntzia
cun totus ses amorusu
ses de oga chesciosu
veru babbu e protetori.

Sa Sardigna totu cantu
ti tenitdi in devotzioni
cun legitima aregioni
is sardus ti nant Santu
nascis po divinu spantu
moris po divinu amori.

S'Onnipotenti t'at fatu
de sa fidi difensori
Millanu vivu ritratu
de Gesus su veru pastori

Gòcius de su S.S. Salvadori



Divinu Eternu Signori,
Po nosu Verbu Incarnau;
Salvainosì de pecau,
Gesus nostru Signori

Cun prodìgiu sentza uguali,
Segundu sa profetzia,
In su sinu de Maria
Pigais forma mortali;
Perdonu e gràtzia speciali
Cunzedendi a su peccadori.

Cun imensa caridadi
Po consolu de is mortalis,
Nasceis intra animalis,
De Betlem in sa citadi,
Imparendi umilidadi
A superbu e traitori

Po su sànguini pretziosu,
chi po nosu eis derramau
Po su Coru bostu liagau
In su Calvariu penosu,

Perdonainosì, piedosu,
In cudda di de rigori.

A is tres dis risuscitau
Cun grandu giùbilu e gosu,
Pustis totu gloriosu
Seis a celu artziau,
Distruendi su pecau,
Vitoriosu e bincidori.

Saludi seis e vida
De s'afliùgiu e dolenti,
In Bosu su penitenti
Tenit sa gràtzia cumplida:
Alcanzendi repertina
S'ànima, donu de amori.

Puru Angioni Imaculau
De celu e terra belleza.
Amanti de sa pureza
E nemigu de su pecau;
Eus po bosu acunistau
Paradisu, gràtzia e onori.

Cun coràgiu e amiratzioni
Curastis sa pestilèntzia,
Chi girat senza clemèntzia
Totu sa Sarda Natzioni;
Cunservendi sentza lesioni
Dogna sardu abitatori.

Su Prus Santu, su prus bonu,
Gesùs nostru Onnipotenti
Aclamaus continuamenti
De celu e terra patronu
De gràtzia su veru donu
Dimandaus, o Signori.

Divinu Eternu Signori,
Po nosu Verbu Incarnau;
Salvainosì de pecau,
Gesus nostru Signori